

四庫全書

子部

欽定四庫全書

太平御覽卷六十四

宋 李昉等 撰

地部二十九

河北諸水

淇水

黃花水

洹水

清水

滏水

漳水

易水

汾水

文水

澮水

晉水

媯水

沁水

鴛漿水

石臼水

潁沱水

衡水

白溝水

屯氏水

鳴犢河水

澤發水

窮魚水

漏水

桑乾河水

拒馬河水

五渠水

金河水

淇水

說文曰淇水出河內共北山東入河

詩曰泌彼泉水亦流于淇

又曰要我乎上宮送我乎淇之上矣

又曰瞻彼淇澳萋竹猗猗

又曰籊籊竹竿以釣于淇淇水悠悠檜楫松舟

韓子曰昔紂為甲卒百萬飲卒于淇右飲馬于洹左洹水竭淇水不流武王甲卒三千破之

隋圖經曰清淇西自魏郡朝歌縣界分為二派一在郡東一在郡西俱南流入河鄴道元注水經云淇水南與清水合而入白溝石會宿胥皆瀆之名淇又一名王莽河王莽所濬

冀州圖經云淇水西從河內郡界入至黎陽而東北至

臨河西至王莽河出焉又東經澶淵東入武陽河南即東郡界是

水經曰淇水出河內隆慮縣西大號山

水經注曰淇水出沮如山水側頽波瀾注衝激橫山山上合下開可減六七十步巨石礫砢交積隍澗傾瀾莽蕩勢同雷轉激水散氣暖若霧合

又曰詩云瞻彼淇澳菉竹猗猗毛云菉王芻也竹徧竹也漢武帝塞決河斬淇園之竹木以為用寇恂為河內

伐竹淇川治夫百餘萬以輸軍資今日之淇無復此物  
唯王島徧草不異

黃花水

隋圖經曰黃花水出隆慮縣西北崖上高十七里去地  
七里懸水東南注壑巖下狀若雞翅俗謂之雞翅水天  
台赤城之流也至谷潛入地下十里復出名曰柳水者  
是黃花水重發源也其谷號為黃花谷內有仙母塚谷  
西有洞穴謂之聖人窟

洹水

隋圖經曰洹水出隆慮縣西北俗謂安陽河即聶伯夢涉之所源出林慮山東平地

清水

水經註曰清水出河內脩武縣之北黑山黑山在縣北白鹿山東清水所出也上承諸陂散泉積以成川南流西南屈曲瀑布垂巖懸河注壑二十餘丈聲震山谷左右石壁層深獸跡不交隍中散水霧合視下見底其水厯澗



流飛清泠洞觀之清水也

滄水

水經注曰滄水發源出石鼓山南巖下泉奮湧滾滾如湯其水冬溫夏冷崖山有魏世所立銘水上有祠能興雲雨滄水又東流注于漳又謂之合河

佛圖澄別傳曰石虎時自正月不雨澄詣滄口祠稽首曝露即日二白龍降于祠下於是雨遍千里

山海經曰神國之山滄水出焉東流注于歐水郭璞注

曰滄水在臨漳縣西滄山經鄴西北至列人縣入于漳  
其水熱

漳水

說文曰濁漳水出上黨長子鹿谷山東入清漳清漳出  
沾山大要谷北入河

呂氏春秋曰史起引障水灌鄴田民初大怨後轉獲利  
相與歌曰鄴有聖令曰史公決漳水灌鄴旁古有斥鹵  
今稻粱

風土記曰南易水本名漳水源出三門山按趙地記云  
六國時此水名易水埤倉及水經云洺水其目不知誰  
改俗謂山之下地名洺水因經之故曰洺水按燕趙記  
云其分有三易漳為南易是也

鄴縣圖經曰濁漳水在縣西水東北津有水縣浦浦西  
五里俗謂之紫陌河北處即俗巫為河伯娶婦處也  
水經注曰清漳水東經沙縣故有沙河之稱

又曰濁漳水出上黨長子縣西發鳩山

又曰漳水出鹿谷山與發鳩連麓而在南淮南子曰謂之發苞山故異名互見山左則陽泉水注之右則散蓋水入焉三源同出一山但以南北為別耳

尚書曰覃懷底績至于衡漳孔安國曰衡橫也言漳水橫流也

### 易水

水經曰易水出涿郡固安縣閭鄉西山

燕丹子曰荆軻入秦不擇日發太子送之于易水之上

荆軻起為壽歌曰風蕭蕭兮易水寒壯士一去兮不復還

固安圖經曰易水又名安國河亦名北易水

汾水

說文曰汾水出太原晉陽山西南入河

山海經曰管務之山其山無木而下多草其下多玉汾水出焉而流注于河

十三州志曰出武周燕之燕京山亦管涔之異名也其

山重阜修層有草無木泉源導於南麓之下

莊子曰堯治天下之民平海內之政往見四子於姑射之山汾水之陽窅然喪其天下焉

說苑曰智伯園趙襄子于晉陽決晉水以灌之晉陽之城不沒者三版智伯曰吾始知水之可以亡人國也

汾水

可以灌安邑絳水可以灌平陽

淮南子曰汾水濛濁而宜麻

水經曰汾水南冠爵津汾名也在介休縣之西南俗謂

之雀鼠谷數十里其間道隘水左右悉結編梁閣道累石就路縈帶巖側或去水一尺或高五六尺上戴山阜下臨絕澗俗謂之為魯般橋蓋通古之津隘亦在今之地險

文水

水經曰文水出大陵縣西山文谷東北入于汾注云縣西南山下武氏穿井給養井至幽深後一朝水溢平流東南注汾水

又曰文水又南逕縣右會隱泉水口水出竭泉山之上  
頂俗云暘雨愆時是禱故山得其名非所詳也其山石  
崖絕險壁立崖半有一石室去地可五十餘丈爰有層  
松飾巖列栢綺望唯西側一處得厯級升陟頂上平地  
一十許頃沙門釋僧光表建二剎泉發于兩寺之門東  
流厯石沿注上下又東津渠隱沒而不恒流故有隱泉  
之名也兩澤並注則通入文水又南經茲氏縣故城東  
為父湖東西一十五里南北三十里世謂之西河在縣



直東于五湖之西側臨湖

澮水

水經曰澮水出河東絳縣東澮交東高山注云一名詳  
高山亦曰河南山西南經翼城北合諸水謂之澮交左  
傳晉悼公謀去故絳欲居郇瑕魏獻子曰不如新田有  
汾澮以流其惡遂居新田又謂之絳蓋在絳澮之陽又  
西南過虎祁宮南入于汾

晉水

水經注曰山海經曰懸甕之山晉水出焉今在縣之西南昔智伯之遏晉水以灌晉陽濬其上源後人踵其遺迹畜以為沼沼西際山枕水有唐虞叔祠水側有涼臺結飛梁於水上左右雜樹交陰希見曦景晉川之中最為勝處

### 媯水

地記曰河東郡首山之東北山中有二泉水南流者曰媯水北流曰汧水二水西經厯山下異流同歸渾流而

注入于河

水經注曰尚書所謂釐降二女于媯汭孔安國曰舜居媯水之汭王肅曰媯汭虞地名皇甫謐曰納二女于媯水之汭馬季長曰水所入曰汭然則汭似非水名今則見有二水異源同歸渾流西注而入于河

沁水

水經曰沁水出上黨涅縣謁戾山注云沁卽洎水也

又曰沁水南廵石門石門是晉安平獻王司馬孚之為

魏野王典農中即將之所造也按其表云孚言臣被明  
詔典河內水利臣既到冀行沁水源出銅鞮山屈曲周  
迴水道九百里自太行以西王屋以東層巘高峻天時  
霖雨衆谷走水小石漂迸水門朽敗稻田汎濫歲功不  
成臣輒按行去堰五里以外方石可得數萬餘枚臣以  
為累方石為門若天旱增堰進水若天霖雨陂澤充溢  
則閉防斷水竟其功足以成河雲雨由人經國之謀暫  
勞永逸聖王所願許可也陛下特出臣表勅大司農府

給人工勿使稽延詔書聽許於是夾岸累石結以為門  
用而代木門矣

鴛漿水

山海經曰解縣南有壇道山山下有水潛出停而不流  
俗為鴛漿水發于上而潛于下厥頂方平有良藥

石白水

水經注曰漢永平中治潯沱石白河按司馬彪後漢郡  
國志常山南行唐縣有石白谷蓋資承潯沱之水轉山

東之費自都盧至羊腸倉將憑汾水以漕太原用實秦  
晉苦役連年轉運所經凡三百八十九隘死者無算拜  
鄧訓為謁者監護水功訓隱括知其難言于肅宗從之  
全活數千人和熹鄧后之父也訓後貴盛叔父以為訓  
積善所致也

### 潯沱水

禮曰晉人將有事于河必先有事于潯沱

隋圖經曰潯沱在深澤縣界光武為赤眉所追至潯沱

河欲渡導吏還乃言水深無船左右懼上使王霸視之  
霸恐驚衆乃言冰堅可渡比至河水亦合以囊沙布冰  
上乃渡未畢數騎冰解今名其處為危渡口是也魏改  
曰清寧河北水常有蛟入五月恒暴變為人於岸上與  
人並行至懸岸處推人與之俱下

衡水

信都記曰衡水亦曰長蘆水即濁漳之下流也水有素  
潭渡厯下博城北而逶迤東北注謂之九爭曲水味鹹

苦俗稱苦河謂之黃漳河是也

白溝水

信都記曰白溝河地接館陶界隋煬帝導為永濟渠亦名御河南自相州洹水縣界流入又北難河出焉蓋魏時河難利導故此瀆有難之稱焉

屯氏水

水經注曰大河故瀆北為屯氏河

前漢書溝洫志曰自塞宣防河復北決于館陶分為屯



氏河廣深與大河等

鳴犢河水

漢書地理志曰河水自靈縣別出為鳴犢河

溝洫志曰元帝永光五年河決清河靈鳴犢口而屯氏河絕

澤發水

隋圖經曰澤發水今俗亦名妬女泉大如車輪水色青百姓祀之婦人不得艷粧衣新綵臨之必興雨雹故云

妬女即介子推妹也

窮魚水

竹書記年曰晉荀瑶伐中山取窮魚之丘

水經云水出魚山山石若巨魚水發其下

漏水

水經曰漏水一名澧水一名鴛鴦水俗謂之北泉源出龍岡縣東南平地以其道源總納衆泉合成一川故也亦謂之鴛鴦水魏都賦所云鴛鴦交谷是也

桑乾河水

水經曰桑乾河水潛承太原汾陽縣北燕京山天池也  
天池亦名大池在靜樂縣北百四十里注云桑乾河水  
潛承燕京之池池在山東之上周迴里餘其水澄渟鏡  
淨潭而不流若安定朝那之湫池也池內曾無片草及  
其風漾有淪輒有小鳥翠色投池銜水若會稽之耘鳥  
矣

拒馬河水

水經注曰拒馬河水即漆水也東北經郎山西望衆崖  
競舉若鳥翼立石巉巖似劍戟之狀又南流經刀山層  
巖直上衝霄望崖側若積刀環

### 五渠水

邢子勵記曰後漢延興初文安縣人孫願捕魚于五渠  
水中有羣魚從西來共以柴塞之忽有人謂願曰須臾  
當得大魚若願多求宜勿殺也後願下網果得大魚其  
狀如鯉而大頭以為異物遂殺食之俄然風雨晝昏唯

聞鳥飛聲比風息雨霽有人乘船至者云前見群魚無數飛入于海願遂不復漁矣因呼入海之處為飛魚口也

金河水

郡國志曰雲中郡有紫河鎮界內有金河水其泥色紫故曰金河

太平御覽卷六十四

欽定四庫全書

太平御覽卷六十五

宋 李昉等 撰

地部三十

關中諸水

戲水

漆水

湫水

魚龍水

隴蜀諸水

蘆水

孱山水

巴字水

縣江水

粉水

瀘水

弱水

黑水

大柳谷水

洮水

馬池水

湟水

江南諸水

沮水

漳水

雷水

鄱陽源水

葛溪水

湓浦水

甘泉水

秦淮水

浙江水

三江水

穀江水

若下水

雲水

紫溪水

公山江水

不竭水

臨水

蘄江水



資水

枉水

沅水

滄浪水

湘水

汨水

五美水

澠水

修仁水

慈廉水

戲水

水經注曰戲水出驪山鴻谷北歷戲亭即周幽王死處  
西征賦所謂兵敗戲水之上身死驪山之北是也

# 漆水

山海經曰榆次之山漆水出焉北流注于渭

水經注曰漆水出扶風杜陽俞山東北入于渭周太王去邠渡漆踰梁山止岐下詩云自土沮漆又曰率西水澍至于岐下

# 湫水

史記曰朝邨有湫泉即華西名川也蘇林曰泉方四十里湛然不流冬夏不增減不生草木能興雲致雨每旱

民禱之

周地記曰楊班為姚萇將居黃梁谷其西有小谷由來無水夜忽有人聲云湫神移徙借車牛有影響至谷西其中忽有水方二百步其水深淺不測冬夏湛然每有旱百姓禱福屢應也

魚龍水

水經注曰有一水出縣西山人謂之小隴山其水東北流歷漚注以成潭出五色魚俗以為龍而莫敢捕採謂

是水為魚龍水

隴蜀諸水

廉水

宋書曰萬柏年梓潼人宋明帝問曰卿鄉土有貪泉否  
柏年曰臣梁益之地有廉水讓水不聞有貪泉帝嘉之  
即拜蜀郡太守一云此水飲之使人廉讓故名之

孱山水

華國志曰涪縣有孱山水其源出金銀礦民得採之

郡國志云漢有金山縣縣東二百里有一水瀨有碎珠  
金銀隨波東注傍水居民採以為業

巴字水

三巴記曰閬白二水合流自漢中至始寧城下入武勝  
曲折三曲有如巴字亦曰巴江經峻峽中謂之巴峽即  
此水也

縣江水

遊蜀記曰左縣緋紅三川所尚縣州左縣郡有汙江所

染緋紅于此水濯後益鮮故為人之所重

### 粉水

水經注曰越雋粉水導源東流經上粉縣取此水以合粉則皓曜鮮潔有異常流故縣人因此名為粉水

### 瀘水

十道記曰瀘水出蕃中入黔府歷郡界出拓州至此有瀘津關關上有石峯高三千丈四時多瘴氣四月間發人衝之立死非此月則人多悶吐唯三月上伏即無害

故諸葛武侯征越嶲上疏云五月渡瀘深入不毛之地  
又按地記云今早明道渡所見有武侯道在又按十道  
記云水浚急而多巉石土人以牛皮為船方涉津溪

弱水

說文曰弱水自張掖郡之西至酒泉合黎餘波入于流  
沙

玄中記曰天下之弱者崑崙之弱水焉鴻毛不能起

黑水

張掖記曰黑水出縣界雞山亦名玄圃有娥氏女簡狄浴于玄丘之水即黑水也

大柳谷水

魏氏春秋曰明帝青龍三年張掖郡刪丹縣金山大柳谷有玄川湓涌寶石焉即魏為晉代之符也

洮水

漢書地理志曰洮水出西羌中北至枹罕東入河沙州記曰洮水出墊江水俱出強臺山山南為墊江源



山東即洮水源也

馬池水

關山圖曰隴西神馬山有泉池龍馬所出

水經注曰馬池水出上邽西南六十里謂之龍泉谷因有神出水事故今有馬池之號也源出嶠冢山

湟水

漢書地理志曰臨羗縣西北至塞外有西王母石室西海大鹽水池北即湟水所出東至允吾入河及湟河亦

名樂都水也縣有土樓山無石而高在縣南又有養女  
嶺彼羗多禱而祈女又有牛心堆皆湟水源山名

江南諸水

沮水

水經曰沮水出漢中房陵縣淮山東南過臨沮縣至枝  
江縣入于江注云沮陽縣西北景山即荆山之首也山  
海經曰金玉是出亦沮水之所導也

漳水

山海經曰漳水出臨沮縣東荆山東南過蓼亭又南過章鄉至枝江縣北入于沮傳曰江漢沮漳楚之望也王仲宣登樓賦曰夾清漳之通浦倚曲沮之長洲

雷水

水經曰南經大雷戍西注大江謂之大雷口一派東南流入江謂之小雷口也宋鮑明遠登大雷岸與妹書乃此地

又孝子傳云孟宗為雷池監作鮓一器以遺母母不納

豫章圖經曰蜀水在豐城縣北按漢書地理志曰蜀水源出縣內小界山東東流入南昌縣與漳水合者老傳云仙人許遜為蜀旌陽令有奇術晉末人皆疫癘多往蜀詣遜請救遜與一器水投於上流疾者飲之無不愈也邑人敬其神異故以雷水為名

### 鄱陽源水

鄱陽記曰鄱陽源是吳芮所居處鄉人祭之為立祠堂東有石澗深三尺鄉人將牲牢告啟擊鼓三通其水衝

出大流隨用並足

葛溪水

鄱陽記曰葛溪水源出上饒縣靈山西昔歐冶子居其溪側以此水淬劍傳之如此後又葛玄家焉因名曰葛溪水

湓浦水

郡國志曰湓浦水有人此處洗銅盆忽水暴漲乃失盆遂投水取之即見一龍銜盆遂懼而出故曰湓浦水也

蕭子顯齊書曰世祖治湓城得尺五刀十一口永明享  
厯之數也

甘泉水

九江圖經曰甘泉水在縣南甘泉驛之南其水味甘飲  
訖又有餘香因以名焉其山即曰甘泉山按州圖經云  
昔山頂有船桅從頂汨流而下土人亦名為桅下溪桓  
伊為九江刺史嘗遣左右齎糧尋之山與冀覩非常乃  
至一處見有大湖湖側有敗船當時聞有桅流下甚疑

惑後聞有船方驗

秦淮水

江寧圖經曰淮水北去縣一里源從宣州東南溧水縣  
烏剌橋西八百五十里

輿地志云秦始皇巡會稽鑿斷山阜此淮即所鑿也故  
名秦淮水孫盛晉春秋亦云是秦所鑿王導令郭璞筮  
即此淮也又稱未至方山有直瀆行三十許里以地形  
論之淮發源詰屈不類人工則始皇掘宜此瀆也

丹陽記云建康有淮源出華山入江

徐爰釋問云淮水西北貫都

輿地志云淮水發源于華山在丹陽湖姑熟之界西北  
流經建康秣陵二縣之間蒙京邑之內至于石頭入江  
懸流三百許里

浙江水

山海經曰浙江水出三天子都在率東西北入海餘暨  
南郭璞注云按地理浙江出黟縣南率東南入海今之



浙江是也率即歙耳餘暨縣名

虞喜志林注曰今錢塘江口折山正居江中潮水投山下折而曲一云江有反濤水勢所歸故云浙江史記云江水至會稽山陰為浙江是也

三江水

郡國志曰禹貢三江謂松江下七十里分流東北入海者為婁江東南流者為東江並松江為三江韋昭曰三江謂吳郡南松江錢塘江浦陽江

虞氏志林云江至彭蠡分為三是即韋說為謬按江自太湖出于海屈曲七百里出鱸即吳左慈為王釣者

穀江水

輿地志曰穀江其水波瀾交錯狀似羅穀之文因以為名

若下水

輿地志曰南岸曰上若北岸曰下若乃村名也村人取若下水以釀酒醇美勝于雲陽

吳錄曰長城若下酒

張協七命云荆南烏程即此酒也

雪水

輿地志曰雪水亦若水之異名也水深不可測俗謂之

雪水

山海經云浮玉之山茗出其陰中多鯀魚今亦謂之雪  
烏水是也

紫溪水

吳興記曰邑有文山水東南流為紫溪興地志云以為水紫色也又云紫溪中央水有赤色盤石長百餘丈望之如霞名曰赤瀨水

公山江水

郡國志曰公山江水有橋自然泛來行人噉之恣飽則可將去則病

不竭水

永嘉地記曰山北有泉衆泉旱竭此泉不竭故名之山

東有瀑布泉長數十丈遊者云山頂太湖中有孤巖獨立皆號為孤房

臨水

湘州記曰臨水經臨賀縣東又南至郡左以合賀水故有臨賀之稱焉

靳江水

湘州記曰靳江水在新東縣西八里水出衡山縣界紫嘉山東流湘江二百八十里昔楚大夫靳尚所封之地

因以名之

資水

湘州記曰資水一名茱萸江

水經云資水東北過益陽應劭曰縣左益水之陽今無益水誠資水之殊目

郡國志云資水岨有石頭城即吳將周瑜築也

枉水

湘州記曰枉水在郡東十七里枉水出焉山西漢溪中

有小灣謂之枉渚山上有楚祠存焉

沅水

水經曰沅水出牂牁且蘭縣為旁溝水東北至鍾城縣為沅水

又曰沅水之北有奇山山有秀石山上拔緣蘿濛幕顏巖臨水實釣渚漁詠之勝也其迷響若鐘音信為神仙之所居者

滄浪水

永初山川記曰漢水古為滄浪即漁父所云滄浪之水  
清兮者今滄浪之水合流出鄧城北界山北蓋後人名  
之非古滄浪也

湘水

說文曰湘水出零陵陽海北入江

湘中記曰湘水至清雖深五六尺見底了然石子如櫟  
楠又五色鮮明白沙如雪赤岸如朝霞綠竹生焉上葉  
甚密下踈寥常如有風氣



淮南子曰所謂樂者豈必釣射瀟湘

水經注曰湘水又經南津城西對橘洲諺曰昭潭無底橘洲浮

郡國志云湘水邊有水魚山本名立石山高八十丈濶十里石色黑而重疊每發一重則有自然魚形女人多刻畫為戲長數寸燒之魚膏腥

汨水

水經注曰汨水西經玉笥山又西為屈潭即汨羅潭是

也屈原懷沙自沉于此故潭以屈為名賈誼史遷皆嘗經此弭楫汭波投弔于潭

五美水

湘中記曰五美水在長沙縣東二十五里光武時有五美女居于此溪之側後因為名

灇水

臨桂圖經曰灇水出縣南二十里柘山之陰西北流至縣西南合零渠五里始分為二昔秦命御史監吏錄自

零陵若渠零陵下瀝水是也

郡國志曰後漢伏波將軍馬援開湘水為渠六十里穿度城今城南流者是因秦舊瀆耳至寶厯初渠道崩舟楫不通觀察使李渤遂疊石造堤分二水每水置石斗門一使制之在人開閉開瀝水則全入桂江擁桂江則盡歸湘水


脩仁水

始興記曰脩仁水西南注連水北有三楓亭五渡水齊

范雲為始興太守至脩仁水酌而飲之賦詩曰三楓何  
習習五渡何悠悠且飲脩仁水不酌貪泉流

慈廉江水

交州記曰慈廉江者昔有李祖仁居此兄弟十人並慈  
孝廉讓因此名江



太平御覽卷六十五

# 欽定四庫全書

子部

太平御覽卷

六十六至  
七十二

詳校官侍讀學士

臣沈咸熙

員外郎 臣牛稔文覆焉

總校官降調編修

臣

倉聖脈

校對官中書

臣

袁文邵

謄錄監生

臣

沈浩

欽定四庫全書

太平御覽卷六十六

宋 李昉等 撰

地部三十一

湖

湖

潭

廣雅曰湖池也

說文曰湖大陂也

史記曰三苗氏左洞庭右彭蠡德義不脩舜滅之此在德不在險

晉書曰陳訓少學天文孫皓以為奉禁都尉知皓必敗時錢塘開湖或言天下當太平青蓋入洛皓以問訓對曰臣能望氣不達湖開塞退告友曰青蓋入洛將以昇觀街壁之事非吉祥也

宋書曰會稽太守孟顗事佛精懇而為謝靈運所輕嘗謂顗曰得道應須慧業文人卿昇天當在靈運前成佛必



在靈運後顓深恨之會稽東郭有廻踵湖靈運求決以  
為田顓堅執不與又求始寧岵嶲湖為田顓又固執靈  
運謂顓非存利民正慮決湖多害生命言論毀復與顓  
遂構讐言隙

唐書曰褚無量字弘度杭州鹽官人也幼孤貧厲志好  
學家近臨平湖時湖中有龍鬬傾里閉就觀之無量時  
年十二讀書晏然不動

風俗通曰吳都曰流瀆四面所限都也周官揚州其浸

五湖按張勃吳錄五湖者太湖之別名以其周行五百

餘里故以五湖為名

虞翻亦云太湖有五道別謂之五湖

或說以太湖射

貴湖上湖洮湖

洮湖一名長塘湖

洮湖為五湖按國語吳越戰於

五湖直在笠澤一湖中戰耳則知或說非也

隋大業記曰五月夏至前三五日吳郡太湖中白魚向

湖側淺水菰蒲之上產子民得採之隨時貢於洛

揚州記曰太湖一名震澤一名笠澤一名洞庭

史記三苗之國

左洞庭右彭蠡裴駰注云今湖中苞山有名穴其深洞無知其極者名洞庭彭蠡則無因此穴之名通呼洞庭

彭蠡即宮庭湖名也越絕書云太湖周一萬六千頃在吳興也

荊州記曰宮庭即彭蠡澤也謂之彭澤湖一名匪孩賄切

澤

在豫章郡

青草湖一名洞庭湖

洞庭湖亦謂之太湖在巴陵郡

雲夢澤一

名巴丘湖凡此並昭昭尤著又廣大也

千寶搜神記曰由拳縣秦時長水縣始皇時童謠曰城門有血城當陷沒為湖有嫗聞之朝往窺門將欲縛之嫗言其故後門將以犬血塗門嫗見血走去忽有大水欲沒縣主簿令幹入白令令曰何忽作魚幹曰明府亦

作魚遂淪為湖

鄭緝之永嘉記曰懷北縣有蔣公湖父老云先代有祭祀祈請者湖輒下大魚與之

秦州記曰武都郡前有湖義熙初有白龍於湖升天

盛宏之荊州記曰宮亭湖廟神甚有靈驗塗旅經過無不祈禱能使湖中分風而帆南北又曰巴陵南有青草湖周廻數百里日月出沒其中湖南有青草山故因為名

劉澄之荊州記曰華容縣東南有雲夢澤一名巴丘湖  
荊州之藪也

劉澄之豫州記曰陳縣地有芍陂湖魏將王陵與吳將  
張休交戰處也

黃關五陵記曰有湖名為丹陂週圍數百頃青波澄映  
洲嶼相望

武昌記曰武昌長湖通江夏有水冬則涸昔時靡所產  
植陶太尉立塘以遏水於此常自不竭因取瑯琊郡陂

湖魚菱以著湖內菱甚甘美異於他處所產鮒魚乃長三尺

劉道真錢塘記曰明聖湖在縣南去縣三里父老相傳有金牛時見神化莫測故以明聖垂名

西京雜記曰顧翽少失父事母母好食雕胡飯常帥子女躬自採擷還家導水鑿川供養每有盈儲家近太湖湖中乃生雕胡無復雜草蟲鳥不敢至焉遂得以為養郡縣表其閭舍

江乘地記曰渴湖中有嘉魚美蓴

劉欣期交州記曰有一湖去合浦四十里每陰雨日百姓見有銅船出水又有一牛在湖中以鷄酒為祭便大獲魚若此禮不設唯得牛糞而已

述征記曰栢冲為江州刺史遣人周行廬山冀覩靈異既陟崇巘有一湖匝生桑樹有白鵠湖中有赤鱗魚使者渴極欲往飲有群白鱗魚張鬚向之使者不敢飲

南康記曰廬山上有平湖湖中有舩音便底在湖心中動

搖便風雨

鄭緝之東陽記曰北山去郡三十餘里有赤松廟故老相傳曰其下有居民曰徐公者嘗登嶺至此處見湖水二人碁博於湖間自稱赤松子安期先生有一壺酌酒以飲徐公公醉而寐其側比醒不復見

劉澄之豫州記曰城父縣有巢湖湖週五里湖中有三山南有四鼎山

戰國策曰秦與荆戰大破之取洞庭五湖



吳地記曰吳王葬女取土成湖

又郡國志云三女墳在郭西云闔閭食蒸魚留半賜三女三女怨自殺王痛之遂葬於郭西文石為槨金印玉牒銀尊珠盤凡諸珍異悉以送葬以水繞墳因謂之女墳湖

又曰葬女之時有白鶴舞於吳市中因入羨門悉化為犬

錢塘記曰去邑十里有詔息湖故老相傳昔秦始皇巡

狩經塗暫憇因以詔息為名

周景式廬山記曰山頂有一窮湖湖足赭鯉尾鬣皆傷剝而又有二故舩槽崇山峻遠非舟楫所遊豈深谷為陵而此物與丘壑同遷乎

顧微廣州記曰廬山上有湖至甲戌日輒聞山有鼓角聲

劉澄之揚州記曰新城縣東有俱山山上有湖湖中有白鵝一隻時時飛來不可常見

劉楨東陽記曰龍目湖秦王東游觀地勢云此有天子氣使赭衣徒鑿湖中長岡使斷因改為丹徒今水北注江也

梁典曰武帝望京峴山盤紆似龍掘其右為龍目二湖徐州先賢傳曰勾踐滅吳謂范蠡曰吾將與子分國而有之蠡曰君行令臣行志乃乘扁舟浮五湖而不返

水經注曰武強縣耆宿云邑人有行於道見一小蛇疑其有靈持而養之名曰擔生長而吞噬人里中患之遂

捕繫獄擔生負而奔邑淪為湖縣長及吏咸為魚矣今縣東北半里許有淵謂之即君淵者宿又言縣淪之日其子東奔又陷於此故淵得即君之名矣

神異經曰北方荒外有湖方千里平滿無高下有魚長七八尺形狀如鯉而目赤晝在湖中夜化為人刺之不入煮之不死以烏梅二七煮之即熟食之可以愈邪病又曰北方荒中有石湖方千里無凸凹

上直結反  
下於交反

平滿

無高下岸深五尺餘恒冰唯夏至左右五六十日解耳

又曰東南海中烜洲上有溫湖其中唯有鯽魚焉長八尺食之宜暑而避寒

郡國志曰潤州遏陂有湖名龍目湖京口出好酒人習戰故桓溫云京口土瘠人寡無可戀唯酒可飲兵可用耳

會稽記曰漢順帝永和五年會稽太守馬臻創立鏡湖在會稽山陰西縣界築塘蓄水高丈餘田又高海丈餘若水少則洩湖灌田如水多則開湖洩田中水入海所

以無凶年堤塘周廻五百一十里溉田九千餘頃

又會稽記云創湖之始多淹塚宅有千餘人怨訴於臺  
臻遂被刑於市及臺中遣使按鞠忽不見人驗籍皆是  
先死亡人之名

又按輿地志云山陰南湖縈帶郊郭白水翠巖互相映  
發有若圖畫

南徐州記曰子英常於芙蓉湖捕魚得赤鯉持歸以穀  
養一年遂生兩翅魚云我來迎汝子英騎之即乘風雨

騰而上天故列仙傳云每經數載來歸見妻子魚復來迎如是數十迴而不返芙蓉湖即射貴湖也又名上湖  
吳地記曰臨平湖在臨平山南

吳志曰歸命侯天璽元年吳郡言臨平湖自漢末草穢擁塞今更除平故老相傳云此湖塞天下亂此湖開天下平又湖邊得石函函中有小石青色長四寸廣二寸餘刻上作皇帝字於是改年大赦俄而晉平吳孫盛以為元皇中興之符

歙縣圖經曰篁墩湖在縣西南其湖有蜃常與呂湖蜃  
鬪程靈銑好勇而善射夢蜃化為人告之曰吾為呂湖  
蜃所厄君能助吾必厚報東白練者吾也明日靈銑彎  
弧助之正中後蜃不知所之後人名其處為蜃灘時有  
一道人詣靈銑母求食訖曰勞母設食今當為求善墓  
地使母隨行上山以白石識其地曰葬此可以暴貴矣  
靈銑因移父葬其所侯景亂靈銑率郡鄉萬餘衆保新  
安因隨陳武帝有奇功及陳武受梁禪靈銑以佐命功



臣與周文昱侯安都為三傑按靈銑宅在湖東二里  
徐愛釋問曰玄武湖本桑泊晉元帝太興元年創為北  
湖

京都記云從北望鍾山似宮亭湖望廬岳齊武帝習水  
軍於此中號曰昆明池故沈約登覆舟山詩云南瞻儲  
胥館北望昆明池即此爾永嘉末有龍見於湖內故改  
為玄武湖

豫章記曰擔石湖在州東北其湖水中有一石山有孔

如人穿擔石故老云壯士擔此兩石置湖中因以為名  
輿地志曰安城有密湖中有萼菜鯽魚為時所重並有  
石窟容百人坐其魚味甘如蜜因此為名在縣東二十  
里

淮南子曰夫歷陽之都一夕化而為湖勇力聖智與不  
肖者同命無遺脫也

荆南志曰高沙湖在枚廻洲上翠澤平晶

胡了切

水陸彌

曠芟荷殷生鱗羽滋阜湖南林野清曠可以栖託故徵

士宗炳昔常家焉北有小水自湖通江謂之魯口是也  
渚宮舊事云江陵城西二十里高沙湖其中多湖魚  
又曰五葉湖昔湖側有主人張姓五葉同居因以為名  
九江記曰彭蠡湖在潯陽縣東南與都昌縣分界湖心  
有大孤山

郡國志云彭蠡湖週迴四百五十里內有石高數十丈  
大禹刻其石以記功焉又有乞烏隨船行舟人擲飯接  
之高下不失一粒今此烏沿江靈廟多有不獨在彭蠡

湖矣

又曰鶴門湖者陶侃微時喪母忽有二客來弔化為雙白鶴飛去後因以為名

丹陽記曰吳孫皓寶鼎元年丹陽縣宣騫之母年八十

浴於後湖化為黿後湖又名練湖

在縣北百二十步

輿地志曰曲阿出名酒皆云後湖水所釀故醇冽也今按湖水上承丹徒陳敏後湖上馬林溪水色白味甘又云練塘陳敏所立遏高陵水以後為後湖

語林曰褚公遊曲阿後湖狂風忽起船傾褚公已醉乃曰此舫人皆無可以招天譴者唯有孫興公多塵滓正當以厭天欲耳便欲捉孫擲水中孫懼無計唯大呼曰

季野卿念我

褚公褚彥回也  
季野彥回子也

伏滔登故臺詩序曰夫差姑蘇臺東有丹湖萬頃內有金銀塘

方輿記曰銅船湖馬援鑄銅船五隻一留此湖中四隻將過海征林邑

潭

幽明錄曰碩縣下有眩潭以視之眩人眼因以為名傍有田陂昔有人船行過此陂見一死蛟在陂上不得下無何見一人長壯烏衣立於岸側語行人云吾昨下陂不過而死可為報眩潭行人曰眩潭無人云何可報烏衣人云但至潭便大言之行如其言須臾潭中有號泣聲

又曰晉元熙中桂陽郡有一老翁常以釣為業後清晨

出釣遇大魚食餌掣綸甚急船人奄然俱沒家人尋喪  
於釣所見老翁及魚並死為釣綸所纏魚腹下有丹字  
文曰我聞曾潭樂故從檐潭來何來一老翁持釣數見  
欺好食赤鯉鱸今日得汝為

荊州圖記曰武當縣西北六里江中名狼子潭潭中有  
石磧州長六十丈世傳狼子未曾從父命臨終欲葬山  
上故謬曰葬我水中狼子唯從此命習鑿齒記云狼子  
是漢時人家在山東五女徼

鄧德明南康記曰梓潭有梓樹洪直巨圍葉長尺餘垂  
柯數畝

又曰贛潭在郡下昔有長者於此潭以釣為事恒作漁  
父歌其聲慷慨忽綸動湏臾一物形似小水牛眼光如  
鏡或言水犀浮躍逐綸角帶金縹釣客因引得縹出水  
數十丈縹斷餘數丈盡是珍寶

羅浮山記曰牛潭深洞無極北岸有石周圍三丈許漁  
人見牛自水而出盤於此石



枹朴子曰昔石頭水有大龜常在潭中因名此為龜潭  
能作魅行病於人吳有道士戴晒者乃以越章封泥遍  
投潭水中良久有大龜徑長丈餘浮出不敢動乃格殺  
之而病人並愈又有小龜出羅列死於水渚甚多

南康記曰梓潭山在雩都縣之東南六十九里其山有  
大梓樹吳王令都尉蕭武伐為龍舟舳斫成而牽引不  
動占云湏童男女數十人為歌樂乃當得下依其言以  
童男女牽拽舳沒于潭中男女皆溺其後每天晴朗淨

髣髴若見人船焉夜宿潭邊或聞歌唱之聲因號梓潭  
焉

鄱陽記曰懷蛟水一名孝經潭在縣南二百步江中流  
石際有潭往往有蛟浮出時傷人焉每至五月五日鄉  
人於此江水以船競渡俗云為屈原攘災前郡守縣懸  
綵以賞之刺史張栖真以人之行莫大於孝懸孝經標  
竿之上而人知勸俗號為懷蛟水或曰孝經潭

湘州記曰益陽有昭潭其下無底湘水最深處也或謂

周昭王南征不復沒於此潭以為名

太平御覽卷六十六

欽定四庫全書

太平御覽卷六十七

宋 李昉等 撰

地部三十二

池

谿

壑

池

廣雅曰沼池也

說文曰隍城池也有水曰池無水曰隍

詩曰東門之池可以沤麻

又曰王在靈沼於牧魚躍

沼池也牧滿也箋云靈沼之水魚盈滿其中皆飛躍言亦

得其  
所也

韓詩外傳曰齊景公出弋昭華之池

傳曰齊伐楚楚子使屈完對曰楚國方城以為城漢水  
以為池齊雖衆無所用之

史記封禪書曰秦始皇遊海上祠名山大川及八神仙

人羨門之屬八神一曰天齊祠天齊天池名臨南郊山

漢書曰昆明池漢武帝元狩三年所穿也初漢欲求身

毒國為昆明池夷所閉昆明有滇池方三百里名曰滇

河漢將伐昆明以通身毒使謫卒伐棘上林象滇河作

昆明池以習水戰池周迴四十里

漢武帝平昆明以其地為益州郡其滇水

原深廣未反淺狹有似倒流故曰滇河潘岳關中記曰昆明池漢武帝習水戰也中有靈沼神池云堯時理水

訖停船此池蓋堯時已有汚池漢代因而深廣耳曹毗志怪云漢武鑿昆明池深極悉是墨灰無復土舉朝不

解以問東方朔朔曰臣愚不足以知之可試問西域胡也以朔不知難以核問至後漢明帝時外國道人入來

洛陽時有憶方朔言者乃以武帝時墨灰問之胡人云  
天地大劫將盡則劫燒此劫燒之餘乃知朔言者是

又曰昭帝元始元年春三月黃鵠下建章宮太液池

又曰宣帝詔曰池籞未御幸者

蘇林曰折竹以繩綿連若禁籞使人不得往來

也

假與貧民郡國宮館勿復脩治

又曰宣帝神爵元年詔曰金芝生于涵德殿銅池中

作銅

池也

魏志曰太祖還鄴作玄武池以肄舟師

晉書曰山簡游優卒歲唯酒是耽諸習氏荆土豪族有



家園池簡每出嬉遊多之池上置酒輒醉名之曰高陽池時有童兒歌曰山公出何許往至高陽池日夕倒載歸酩酊無所知時時能騎馬倒著白接羅舉鞭向葛疆何如并州兒疆家在并州簡愛將也

又曰荀勗久在中書專管機事失之甚怏怏或有賀之者勗曰奪我鳳凰池諸君賀我耶

後魏書曰文明皇太后馮氏與高祖幸靈泉池醺群臣太后忻然歌高祖亦和歌歌者九十人

唐書曰將鎮為諫議大夫時戶部侍郎判度支韓滉上言河中鹽池生瑞鹽實土德之上瑞上以秋霖稍多水潦為患不宜生瑞命鎮馳驛檢按之鎮奏與滉同仍上表賀請宣付史館並請置神祠錫其號寶應靈慶池又曰文宗用鄭注言即命左右神策軍差入淘曲江昆明二池仍許公卿士大夫之家於江頭立亭館以時遊賞

遁甲開山圖榮氏解曰境北有陽石山中有神龍池黃

帝時雲揚先生養龍於此帝王歷代養龍之處國有水旱不時祀池請雨

晉宮閣名曰靈芝池廣長百五十步深二丈上有連樓飛觀四出閣道釣臺中有指南舟

袁山松宜都記曰佷山縣東六十里有山名下魚城四面絕崖唯兩道可通皆峻嶮上周廻可二十里有林池水民田種於山上昔永嘉亂土人登此避賊賊守之經年食盡取池魚擲下與之禾不窮賊遂退散因名此

為下魚城

辛氏三秦記曰昆明池通白鹿源有釣魚綸絕而去夢於漢武求去其鉤明日遊於池見大魚銜鉤帝去其鉤而逝又間三月帝復遊池濱得明珠一雙武帝曰豈昔魚之報也

湘州記曰湘南縣有架山下有小池常涸民齋戒往請自然而滿事訖還乾

雷次宗豫章記曰去洪井六七里有風雨池山橋水出

激著樹木星散遠灑如風雨焉

襄陽記曰峴山南有石季倫習都大魚池依范蠡養魚  
法當中築一釣臺季倫將亡勅其兒曰必葬我近魚池  
山季倫每臨此輒大醉而歸

臨川記曰崇仁縣有鹹池按陳書司空黃法氈

音翟

字仲

昭崇仁縣巴山人也侯景亂法氈於鄉里聚徒以助高  
祖有功薨墓在崇仁縣巴山鄉故老相傳法氈有奇術  
常欲變置鹹池於家山之下幅圓六十餘畝至今水味

獨鹹於他水而湛然清潔禽畜不敢觸之

西京雜記曰梁孝王好宮室苑囿之樂作曜華之宮築兔園園中有靈山山安膚寸石又鴈池池中鶴洲鳬渚奇果異樹珍禽怪獸畢備王日與宮人及賓客弋釣其中

又曰積草池中有珊瑚樹高一丈二尺一云三柯上四百六十二條是越國王趙佗所進號為烽火樹至夜光景照焉

述征記曰廣陽門北有魏明帝流杯池

穆天子傳曰天子西征於玄池天子三日休於玄池之

上天子乃樹之竹

種竹池邊

是曰竹林

又曰天子觴西王母于瑤池上西王母為天子謠

三輔故事曰漢武帝作昆明池武帝崩後於池中養魚以給

諸陵祠餘付長安市池有二石人如牽牛織女像

又曰未央宮西有大池池中有臺王莽死於是焉

廣州先賢傳曰丁密字靖公蒼梧人父艱泣血三年飛

鳧一雙遊密廬傍小池

郡國志曰晉州臨汾縣臭水池百畜不飲一名翻鑊池  
今池上有脂潤

又曰成都郡秦惠王二十七年使張儀築以象咸池沃  
野千里號曰陸海有萬歲池是築城取土處

又曰合浦海曲出珠號曰珠池又有夷人號越邑多採  
甲香為業

世說曰晉明帝欲作池臺元帝不許時明帝為太子養



武士一夕中作池曉便成即今謂太子池是也

又曰太原王國寶治宅因浚池忽見一物如酒杓形長四尺許飛去

水經注曰隴西神馬山有淵池龍馬所生即是水西流謂之馬池

又曰蔡州西即蔡倫故宅傍有蔡子池倫漢黃門郎順帝之世始擣故魚網為紙用代簡素自其始也

又曰滇池中有神馬家馬交之則生駿駒日行五百里

顧子曰與子華遊於東池子華曰水有四德池為一焉  
沐浴群生流澤萬世仁也揚清激濁盪滌塵穢義也弱  
而難勝勇也導江疏河變盈流謙智也顧子曰我得汝  
於池上矣

方輿記曰興元府南鄭縣天池山上有池方二十里冬  
夏不竭久飲之可愈痼疾故號天池

又曰梅福池一名風雨池梅福種蓮池福歎曰生為我  
酷身為桎梏形為我辱智為我毒於是棄南昌縣尉去

妻子入洪崖山得道為神仙代代有人見或在玉笥山  
逢之今西山有梅君壇南昌開元觀有梅君堂焉

又曰明月池在興道縣西北中有一臺云是漢高所營  
水經注云形如偃月故號明月池

又曰七女池昔有人無男而養七女父亡七女負土葬  
父取土之處今成一池號曰七女池邊又有七女塚

呂氏春秋曰衛靈公天寒鑿池宛春諫曰天寒公曰天  
寒乎宛春曰公衣狐裘坐熊席陬隅有竈是以不寒

淮南子曰陰氣極則下至黃泉故不可鑿池穿井

谿

尚書大傳曰呂尚釣於磻谿得魚腹中有玉璜

春秋說題辭曰谿者隱也

老子曰知其雄守其雌為天下谿

爾雅曰水注川曰谿

桓彛別傳曰彛字茂倫明帝世彛與當時英彥名德庾亮溫嶠羊曼等共集清谿池上郭璞與焉乃援筆屬詩

以白四賢並自序

武昌記曰樊山東有山谿夏時凜凜恒有寒氣故謂之寒谿

王韶之始興記曰連水下流有斟谿一日十溢十竭  
盛宏之荊州記曰鄆縣北五十里有菊谿源出石澗山  
有甘菊村人食此水多壽

又曰零陵郡西有渡溪山獸從數十里往飲之經越他  
水皆不飲傍有半石坑上石形極方峭名為仙人樓

又曰桂陽郡橫谿水甚深冬夏不乾俗謂之貪泉也

又曰郡西南五十里有萬歲山有石窟出鍾乳山上悉生靈壽木下有一谿名為千秋水其傍有居民即號萬歲村

水經注曰長陽谿源右穴中有神魚大者二尺小者一尺居民釣魚先陳所須多少拜而請之拜訖投釣得魚過數者水輒波涌暴風卒起樹木摧折水側生異花路人欲是者皆當先請不得輒取

又曰白馬谿水出宜陽山有大石厥狀似馬故谿以物色受名也

水經注曰向城有水二源俱北流合為一川名為天漿谿也

又曰閩中有徐登者女子化為丈夫與東陽趙昞並善仙術時遭兵亂相遇於谿各矜其所能登先禁谿水為不流昞次禁枯柳為生稊二人相視而笑登年長昞師事之後登身故昞東入章安百姓未知昞乃升茅屋檮

鼎而鑿主人驚怪哂笑而不應屋亦不損又嘗臨水求渡船人不許哂乃張蓋坐中長嘯呼風亂流而渡於是百姓神服從者如歸市

水經注曰山陰縣西南四十里有二谿東谿廣一丈九尺冬暖夏冷西谿廣三丈五尺冬冷夏暖二谿北出行三里至徐村合成一谿廣五丈餘而溫涼不雜蓋山經所謂茗水也

又曰朐腮縣有龜溪出靈龜咸熙元年獻龜於相府言



出自此溪也

郡國志曰豫州吳房縣吳王闔閭之弟夫槩王奔楚楚封之於堂溪

郡國志曰王昭君秭歸人也有香溪即昭君每常遊翫之處

又曰資陽縣有環溪百丈池所謂溪流如環其池深百尺也

又曰陵陽山在石埭縣北三里按輿地志云陵陽令竇

子明於溪側釣魚一日釣得白龍子明憐而放之後數年又釣得一白魚割其腹中乃有書教子明燒鍊食餌之術三年後白龍來迎子明遂得上昇其溪環繞山足今有仙壇醮祭不絕

信州圖經曰師溪水源出黃蘗山北面在弋陽縣東南一百十餘里昔有隱士胡趨居於此處衆人師之故名師溪

越絕書薛燭謂越王曰若耶之溪涸而出銅也古歐冶

子鑄劍之所故戰國策云涸若耶以取銅破堇山而出  
錫焉

郡國志曰歐冶子鑄劍之處下有孤潭深而清有孤石  
聳出潭上有大櫟樹謝客兒與弟惠連作詩句屢屢刻  
於樹上

吳興記曰前溪在縣東南流入太湖謂之風渚夾溪悉  
生箭筈稜溪在市北東出餘不亭晉車騎將軍沈充作  
前溪歌曲傳者以為指此溪也

管子曰桓公征北孤竹迴未至卑耳之谿援弓而射未敢發謂左右曰見前人乎對曰不見公曰寡人見人長尺而人物具焉管仲曰臣聞霸王之君興則登山神見公拜曰仲父之聖若此

世說曰郗僧施青谿中汎舟一曲處輒作一篇詩謝益壽見詩嘆曰青谿中曲何可窮

水經注曰磻溪即太公釣所也石高深泉邃密林障秀阻人迹罕交東南隅有石室蓋太公所居也水次平石

即太公垂釣之處也其水清冷神異北流注於渭

廣州記曰百管谿周迴丈餘水極沸涌如猛火煎油聲  
臨海圖經曰銅溪在縣西北五十里其水黃色狀似銅  
故號銅溪也

孫興公天台山賦云過靈溪而一躍

善歌錄曰武溪水源出武山東南流注于溪故為歌曰  
武溪深復深飛鳥不能渡遊獸不能臨又下潦上霧看  
飛鳥墮水中即此也

壑

周易略例曰隆墀永歎遠壑必盈

禮記曰大蜡之祭辭曰土反其宅水歸其壑

山海經曰東海之水有大壑

列子曰渤海之東不知幾億萬里有大壑實惟無底之  
谷曰歸墟

莊子曰大壑之為物注焉而不滿取焉而不竭

又曰藏舟於壑藏山於澤謂之固矣然而夜半有力者

負之而走昧者不知也

孟子曰志士不忘在溝壑

太平御覽卷六十七